



ს ა ქ ა რ თ ვ ე ლ ო
სენაკის მუნიციპალიტეტის მერი



ბრძანება:ბ40.40221442

თარიღი:24/05/2022

ვიდეო სათვალთვალ სისტემის საშუალებით პერსონალურ მონაცემთა დამუშავების წესის დამტკიცების შესახებ

საქართველოს ორგანული კანონის „ადგილობრივი თვითმმართველობის კოდექსი“ 54-ე მუხლის პირველი პუნქტის „ე. ე.“ ქვეპუნქტის, 61-ე მუხლის მე-3 პუნქტის „ა“ ქვეპუნქტის და საქართველოს კანონის „საქართველოს ზოგადი ადმინისტრაციული კოდექსი“ 52-ე მუხლის საფუძველზე

ვ ბ რ ძ ა ნ ე ბ :

1. დამტკიცდეს ვიდეო სათვალთვალ სისტემის საშუალებით პერსონალურ მონაცემთა დამუშავების წესი თანდართული დანართი №1-ის შესაბამისად.
2. კონტროლს ბრძანების შესრულებაზე განვახორციელებ პირადად.
3. ბრძანება ძალაშია გაცნობისთანავე.
4. ბრძანება შეიძლება გასაჩივრდეს გაცნობიდან ერთი თვის ვადაში სენაკის რაიონულ სასამართლოში (მის: ქ. სენაკი, შ. რუსთაველის ქ. №247).

ვახტანგ გადელია

სენაკის მუნიციპალიტეტის მერია-მერი

გამოყენებულია კვალიფიციური
ელექტრონული ხელმოწერა/
ელექტრონული შტამპი



ვიდეო სათვალთვალო სისტემის საშუალებით პერსონალურ მონაცემთა დამუშავების წესი

მუხლი 1.

ეს წესი განსაზღვრავს სენაკის მუნიციპალიტეტის მერიის (შემდგომში - მერია) მიერ ვიდეო სათვალთვალო სისტემის გამოყენების მიზნებს, ფარგლებს, მონაცემთა შენახვის ვადებს და მათზე წვდომის საკითხებს.

მუხლი 2.

მერია საკუთარი შენობის (ილია ჭავჭავაძის ქუჩა №103 და შოთა რუსთაველის ქუჩა №235) ვიდეოთვალთვალს ახორციელებს მხოლოდ პირის უსაფრთხოებისა და საკუთრების დაცვის მიზნებისთვის. კერძოდ:

ა) ილია ჭავჭავაძის ქუჩა №103-ში მდებარე შენობის გარე პერიმეტრზე განთავსებული 9 ვიდეოკამერის საშუალებით განხორციელებული ვიდეოთვალთვალის მიზანია მერიის საკუთრების დაცვა;

ბ) ილია ჭავჭავაძის ქუჩა №103-ში მდებარე შენობის მისაღებსა და დერეფანში განთავსებული 5 ვიდეოკამერის საშუალებით განხორციელებული ვიდეოთვალთვალის მიზანია მერიის თანამშრომელთა და სხვა ფიზიკურ პირთა უსაფრთხოების დაცვა;

გ) შოთა რუსთაველის ქუჩა №235-ში მდებარე შენობის გარე პერიმეტრზე განთავსებული 3 ვიდეოკამერის საშუალებით განხორციელებული ვიდეოთვალთვალის მიზანია მერიის საკუთრების დაცვა;

დ) შოთა რუსთაველის ქუჩა №235-ში მდებარე შენობაში განთავსებული 2 ვიდეოკამერის საშუალებით განხორციელებული ვიდეოთვალთვალის მიზანია მერიის თანამშრომელთა და სხვა ფიზიკურ პირთა უსაფრთხოების დაცვა.

მუხლი 3.

1. დაუშვებელია ვიდეო სათვალთვალო სისტემის გამოყენებით აუდიოჩანაწერა.
2. დაუშვებელია ვიდეოთვალთვალის გამოყენება გამოსაცვლელ ოთახებში და ჰიგიენისათვის განკუთვნილ ადგილებში.
3. დაუშვებელია ვიდეო სათვალთვალო სისტემის გამოყენება სხვა მიზნებისთვის, გარდა ამ წესის მე-2 მუხლში მითითებული მიზნებისა, მათ შორის, დაუშვებელია სისტემის გამოყენება თანამშრომელთა მონიტორინგის და/ან მათ მიმართ დისციპლინური წარმოების განხორციელების მიზნით.

მუხლი 4.

1. ვიდეოთვალთვალის თაობაზე შესაბამისი გამაფრთხილებელი ნიშანი (დანართი №1) განთავსებულია თვალსაჩინო ადგილას - თითოეული კამერის ხედვის არეალში მოხვედრამდე.
2. სამუშაო ადგილზე ვიდეოთვალთვალისა და საკუთარი უფლებების შესახებ მერიაში დასაქმებული თითოეული პირი წერილობით არის ინფორმირებული (დანართი №2).

მუხლი 5.

1. ვიდეოთვალთვალის სისტემა მუშაობს როგორც რეალურ დროში გადაცემის, ისე ჩაწერის რეჟიმში.
2. ილია ჭავჭავაძის ქუჩა №103-ში და შოთა რუსთაველის №235-შიმდებარე შენობებში განთავსებული ვიდეო სათვალთვალო სისტემის (როგორც მიმდინარე, ისე ჩაწერილ) მონაცემებზე წვდომა აქვს შსს სსიპ დაცვის პოლიციის დეპარტამენტის, სამეგრელო-ზემო სვანეთის რეგიონალური დაცვის პოლიციის სამმართველოს, სენაკის დაცვის პოლიციის განყოფილების, სენაკის მუნიციპალიტეტის მერიის დაცვის პოლიციელს.
3. ვიდეოთვალთვალის სისტემაში ჩანაწერები ინახება ილია ჭავჭავაძის ქუჩა №103-ში, დაცვის თანამშრომლებისთვის გამოყოფილ ოთახში და შოთა რუსთაველის №235-ში, საამისოდ გამოყოფილ ადგილზე განთავსებულ ორ სერვერზე 10 დღის ვადით, რომლის გასვლის შემდეგაც ჩანაწერები ავტომატურად იშლება.
4. სერვერზე შენახულ ჩანაწერებზე წვდომა აქვს მხოლოდ მუნიციპალიტეტის მერს და შსს სსიპ დაცვის პოლიციის დეპარტამენტის, სამეგრელო-ზემო სვანეთის რეგიონალური დაცვის პოლიციის სამმართველოს, სენაკის დაცვის პოლიციის განყოფილების, სენაკის მუნიციპალიტეტის მერიის დაცვის პოლიციელს ინდივიდუალური მომხმარებლის სახელისა და პაროლის გამოყენებით. ასევე, შესვლა შეუძლია მხოლოდ სენაკის მუნიციპალიტეტის შიდა აუდიტის სამსახურს აუცილებლობის შემთხვევაში, მიმდინარე ადმინისტრაციული წარმოების ფარგლებში.
5. ჩანაწერების მიმართ განხორციელებული ნებისმიერი ქმედება (დათვალიერება, გადმოწერა, წაშლა და ა.შ.) აღირიცხება (ლოგირდება).
6. მერიის შიდა აუდიტის სამსახური 3 თვეში ერთხელ ამოწმებს სისტემაზე წვდომის ფაქტებს და დარღვევის აღმოჩენის შემთხვევაში მიმართავს შესაბამის ზომებს.

მუხლი 6.

1. ვიდეო სათვალთვალო სისტემის ჩანაწერების დათვალიერება და/ან მესამე პირებზე გადაცემა დასაშვებია მხოლოდ:
 - ა) შსს სსიპ დაცვის პოლიციის დეპარტამენტის, სამეგრელო-ზემო სვანეთის რეგიონალური დაცვის პოლიციის სამმართველოს, სენაკის დაცვის პოლიციის განყოფილების, სენაკის მუნიციპალიტეტის მერიის დაცვის პოლიციელის მიერ მხოლოდ პირის უსაფრთხოების დარღვევისა და საკუთრების შესაძლო ხელყოფის შემთხვევაში, მერის დასაბუთებული ინდივიდუალური სამართლებრივი აქტის საფუძველზე, რომელშიც მითითებულია ჩანაწერის დათვალიერების მიზანი, საფუძველი და აუცილებლობა;

ბ) სამართალდამცავი ორგანოებისათვის მხოლოდ მოსამართლის განჩინებისა ან პროკურორის (დადგენილების) საფუძველზე;

გ) საქართველოს კანონმდებლობით პირდაპირ გათვალისწინებულ შემთხვევებში და წესით.

2. ვიდეო სათვალთვალო სისტემის ჩანაწერების დათვალიერების და/ან მესამე პირებზე გადაცემის ყველა შემთხვევა აღირიცხება დათვალიერების/გადაცემის ზუსტი დროის, შესაბამისი პირებისა და დათვალიერების/გადაცემის საფუძვლის მითითებით.

მუხლი 7.

1. ნებისმიერ პირს, რომელიც ხვდება ან შეიძლება მოხვდეს ვიდეო სათვალთვალო სისტემის ხედვის არეში უფლება აქვს:

ა) მიიღოს ინფორმაცია ვიდეოთვალთვალის გზით მონაცემთა დამმუშავებლის, ვიდეოთვალთვალის განხორციელების მიზნისა და სამართლებრივი საფუძვლის შესახებ;

ბ) მიიღოს მისი ვიდეოჩანაწერის ასლი;

გ) მოითხოვოს ვიდეოჩანაწერის წაშლა, დაბლოკვა, გასწორება;

დ) მიიღოს ინფორმაცია ვიდეოჩანაწერის მესამე პირებისთვის გადაცემის შესახებ, თუ არ არსებობს მონაცემთა სუბიექტის უფლების შეზღუდვის კანონიერი მიზანი და საფუძველი;

ე) ისარგებლოს მონაცემთა სუბიექტისთვის კანონმდებლობით მინიჭებული სხვა უფლებებით.

2. ამ მუხლით გათვალისწინებულ საკითხებს განიხილავს და გადაწყვეტილებას იღებს მერიის მონაცემთა დაცვის ოფიცერი „პერსონალურ მონაცემთა დაცვის შესახებ“ საქართველოს კანონით გათვალისწინებული შეზღუდვების გათვალისწინებით.

მუხლი 8.

ამ წესის დარღვევა წარმოადგენს მერიის შინაგანაწესის დარღვევას და ითვალისწინებს შესაბამის დისციპლინურ პასუხისმგებლობას.

ვიდეოთვალთვალის თაობაზე გამაფრთხილებელი ნიშნის სტანდარტული ფორმა



სენაკის მუნიციპალიტეტის

მერია

24 საათი

ინფორმირება სამუშაო ადგილზე ვიდეოთვალთვალის განხორციელების თაობაზე

„პერსონალურ მონაცემთა დაცვის შესახებ“ საქართველოს კანონის მე-12 მუხლი მე-3 და მე-5 პუნქტების შესაბამისად გაცნობებთ, რომ ფიზიკურ პირთა უსაფრთხოებისა და მერიის საკუთრების დაცვის მიზნით თქვენს სამუშაო ადგილზე, კერძოდ,

(იმ თანაშრომლის ვინაობა, ვისი სამუშაო სივრცეც ხვდება ვიდეოთვალთვალის არეალში)

24-საათიან რეჟიმში მიმდინარეობს ვიდეომონიტორინგი. ჩანაწერები ინახება არაუმეტეს 10 კალენდარული დღის ვადით.

თქვენ უფლება გაქვთ მოითხოვოთ იმ ვიდეოჩანაწერის ასლი, რომელიც შეიცავს თქვენს მონაცემებს, ინფორმაცია თუ ვის ჰქონდა წვდომა და/ან გადაეცა თქვენი მონაცემები (ვიდეოჩანაწერი), ინფორმაცია მონაცემთა დამმუშავებლის, დამუშავების მიზნებისა და საფუძვლების შესახებ და, ასევე, ისარგებლოთ „პერსონალურ მონაცემთა დაცვის შესახებ“ საქართველოს კანონით გათვალისწინებული მონაცემთა სუბიექტის უფლებებით.

თქვენი უფლებების რეალიზებისათვის და მონაცემთა დამუშავებასთან დაკავშირებულ საკითხებზე შეგიძლიათ მიმართოთ მონაცემთა დაცვის ოფიცერს _____

ასევე, თქვენი უფლებებისა და თავისუფლებების დასაცავად შეგიძლიათ მიმართოთ პერსონალურ მონაცემთა დაცვის სამსახურს (www.pdp.ge, (+995 32) 242 1000, office@pdps.ge) და/ან სასამართლოს.

პოზიცია _____

სახელი, გვარი _____

ხელმოწერა _____

თარიღი _____ 202__ წ.